

ADAT BACAAN SURAH YĀSĪN MALAM JUMAAT DI MALAYSIA: KAJIAN TAKHRĪJ AL-ḤADĪTH DAN HUKUM BACAANNYA PADA MALAM JUMAAT

The Custom of Reading Surah Yāsīn on Friday Nights in Malaysia: A Study of Takhrīj al-Ḥadīth and The Law of Reading It On Friday Night

^{i*}Ahmad Mursyid Azhar

ⁱⁱMuhammad Syahrul Abd Rahman

ⁱ Fakulti Usuluddin, Jabatan Hadith, Universiti Al-Azhar, El-Darb El-Ahmar, Kaherah, Mesir,
e-mail: ahmadmursyid80@gmail.com

ⁱⁱFakulti Syariah, Jabatan Pengajian Syariah Islamiah, Universiti al-Azhar, El-Darb El-Ahmar, Kaherah, Mesir,
e-mail: syahrulabdrahman1998@gmail.com

*(Corresponding Author) e-mail: ahmadmursyid80@gmail.com

ABSTRAK

Amalan membaca surah Yāsīn pada malam Jumaat telah menjadi satu adat kebiasaan bagi masyarakat Islam di Malaysia. Adat membaca surah Yāsīn pada malam Jumaat telah menjadi persoalan serta tentang asal-usul dan dalil keharusan bagi pengamalan ini. Justeru itu, satu kajian *takhrīj al-ḥadīth* dan kajian hukum Bacaan surah Yāsīn malam Jumaat dijalankan bagi menjawab persoalan dan keraguan yang timbul, Kajian *takhrīj al-ḥadīth* dijalankan bagi mengkaji hadith berkaitan kelebihan membaca surah Yāsīn pada malam Jumaat. Perisian *Maktabah al-Shāmilah* digunakan bagi analisis hadith-hadith yang berkaitan di samping kitab-kitab biografi perawi hadith dan *‘ilal al-ḥadīth* menjadi rujukan dalam kajian ini. Jurnal-jurnal berkaitan dengan pengamalan bacaan surah Yāsīn di Malaysia juga dirujuk bagi mengetahui latar belakang pengamalannya. Seterusnya kajian hukum membaca surah Yāsīn pada malam Jumaat turut dilaksanakan dengan merujuk kepada kitab-kitab *fiqh* dan hadith yang berkaitan. Kaedah *uṣūl al-fiqh* dan *fiqh al-ḥadīth* digunakan dalam kajian ini. Hasil kajian mendapati terdapat hadith *ḍa‘īf* berkaitan kelebihan membaca surah Yāsīn pada malam Jumaat. Manakala hukum membaca surah Yāsīn pada malam Jumaat adalah harus berdasarkan dalil-dalil yang lebih umum.

Kata kunci: Hukum bacaan, malam Jumaat, surah Yāsīn, *takhrīj al-ḥadīth*.

ABSTRACT

The practice of reading surah Yāsīn on Friday night has become a customary practice for the Muslim community in Malaysia. The custom of reading surah Yāsīn on Friday night has become a question as well as about the origins and evidence of necessity for this practice. Therefore, a study of *takhrīj al-ḥadīth* and a study of the law of reading surah Yāsīn on Friday night was conducted to answer the questions and doubts that arose, a study of *takhrīj al-ḥadīth* was conducted to study the hadith related to the advantages of reading surah Yāsīn on Friday

night. The *Maktabah al-Shāmilah* software is used for the analysis of related hadiths in addition to biographical books of hadith narrators and *‘ilal al-ḥadīth* as references in this study. Journals related to the practice of reciting Surah Yāsīn in Malaysia are also referred to to find out the background of the practice. Next, the legal study of reading Surah Yāsīn on Friday night was also carried out by referring to books of *fiqh* and related hadith. The methods of *uṣūl al-fiqh* and *fiqh al-ḥadīth* are used in this study. The results of the study found that there is a *ḍa‘īf* hadith related to the advantages of reading surah Yāsīn on Friday night. While the law of reading surah Yāsīn on Friday night should be based on more general arguments.

Keywords: Friday night, reading law, surah Yāsīn, *takhrīj al-ḥadīth*.

PENDAHULUAN

Surah Yāsīn (يس) merupakan surah yang ke-36 di dalam al-Qur’ān mengikut tertib susunan surah. Surah ini merupakan kategori surah *makkiyyah*. Menurut al-Qurṭubī di dalam tafsir beliau, surah Yāsīn merupakan surah *makkiyyah* secara ijmak dan surah ini mempunyai 83 ayat.¹ Surah Yāsīn mempunyai beberapa pengajaran serta intisari penting yang boleh diambil untuk diteladani. Antara intisari surah ini adalah tentang beriman kepada hari kebangkitan, kisah ahli *al-Qaryah* serta bukti yang jelas tentang keesaan Allah SWT². Menurut al-Ṣabūnī, surah ini dinamakan Yāsīn kerana Allah SWT memulakan surah ini dengan kalimah Yāsīn yang merupakan huruf *muqatta‘ah* yang menunjukkan mukjizat al-Qur’ān.³

Berdasarkan riwayat-riwayat hadith tertentu serta beberapa nukilan ulama terdahulu, surah Yāsīn juga mempunyai beberapa kelebihan bagi sesiapa yang membacanya. Ibn Kathīr mengemukakan nukilan sebahagian ulama:

*Antara kelebihan surah ini adalah surah ini tidaklah dibaca ketika seseorang berada dalam kesusahan melainkan Allah SWT akan memudahkannya.*⁴

Imam Aḥmad pula menukilkkan satu riwayat di dalam *Musnad* beliau:

*Kata para ulama, jika dibaca surah Yāsīn di sisi orang yang sedang nazak akan diringankan baginya sakaratulmaut.*⁵

Antara hadith yang menerangkan tentang kelebihan membaca surah Yāsīn adalah seperti kelebihan membacanya di sisi orang yang sedang nazak. Perkara ini bertepatan dengan hadith daripada Ma‘qil bin Yasār, sabda Rasulullah SAW:

¹ Al-Qurṭubī, Muḥammad bin Aḥmad, *al-Jāmi‘ Li’ahkām al-Qur’ān*, (Mesir: Dār al-Kutub al-Miṣriyyah, 1964), 15:1.

² Al-Ṣabūnī, Muḥammad ‘Alī, *Ṣafwah al-Tafāsīr*, (Beirut: al-Maktabah al-‘Aṣriyyah, 2018), 2:1004.

³ Al-Ṣabūnī, *Ṣafwah al-Tafāsīr*, 2:1004.

⁴ Ibn Kathīr, Ismā‘īl bin ‘Umar, *Tafsīr al-Qur’ān al-‘Aẓīm*, (Arab Saudi: Dār Ṭaybah, 1999), 6:562.

⁵ Aḥmad Ibn Ḥanbal, *Musnad Aḥmad*, (Beirut: Mu‘assasah al-Risālah, 2001), 28:171.

اقرأوا على موتاكم يس

Maksudnya: Bacakanlah kepada mereka yang sedang nazak itu surah Yāsīn.⁶
(Riwayat Ibn Ḥibbān)

Selain itu, terdapat juga hadith yang menyatakan surah Yāsīn adalah *qalb al-qur'ān* seperti hadith yang diriwayatkan juga oleh Ma'qil bin Yasār, sabda Rasulullah SAW:

ويس قلب القرآن

Maksudnya: Dan surah Yāsīn adalah *qalb al-Qur'ān*.⁷
(Riwayat Aḥmad)

Hadith ini dinilai *ḍa'if* pada sanadnya oleh Syu'aib al-Arnā'ūṭ. Walaupun begitu, hadith ini mempunyai jalan periwayatan (*syawāhid*) yang lain seperti riwayat Anas bin Mālik yang dikeluarkan oleh al-Tirmidhī dalam *Sunan* beliau⁸ dan riwayat Abū Hurayrah yang dikeluarkan oleh al-Bazzār dalam *Musnad* beliau.⁹

TOPIK UTAMA

1. Adat Bacaan Yāsīn Malam Jumaat Di Malaysia

Adat menurut Kamus Dewan terdapat beberapa definisi. Antara maksud adat menurut Kamus Dewan adalah cara yang sudah menjadi kebiasaan, sifat, kebiasaan.¹⁰ Di Malaysia, masyarakat Islam tempatan telah lama mengamalkan adat bacaan Yāsīn pada setiap minggu bertepatan pada hari Khamis malam Jumaat. Menurut Ishak Suliaman, umat Islam di Malaysia tidak asing lagi dengan bacaan Surah Yāsīn pada setiap malam Jumaat. Ia samada dilakukan di surau-surau mahupun masjid di kebanyakan tempat di seluruh negara kecuali beberapa kawasan tertentu. Ia juga pada kebiasaannya akan diiringi dengan bacaan tahlil arwah antara waktu selepas maghrib dan isyak.¹¹ Begitu juga seperti yang dinyatakan oleh sebahagian pengkaji dalam penulisan mereka:

“Membaca Surah Yāsīn dan ditentukan bacaannya pada malam Jumaat menjadi satu kebiasaan dalam kalangan masyarakat Islam di Malaysia.

⁶ Ibn Ḥibbān, Muḥammad bin Ḥibbān. *Al-Taḳāsim Wa al-Anwā'*, (Beirut: Dār Ibn Ḥazm, 2012), no hadis, 1712, 2:474.

⁷ Aḥmad bin Ḥanbal, *Musnad Aḥmad*, (Beirut: Mu'assasah al-Risālah, 2001), no hadis. 20300, 33:417

⁸ Al-Tirmidhī, Muḥammad Ibn Īsā. *Sunan al-Tirmidhī*, (Mesir: Muṣṭafā al-Bābī al-Ḥalabī, 1975), no hadis. 2887, 5:162.

⁹ Al-Bazzār, Aḥmad bin 'Amr, *Musnad al-Bazzār: al-Baḥr al-Zakḥkhār*, (Saudi: Maktabah al-'Ulūm Wa al-Hikam, 2009), no hadis. 9313, 16:190

¹⁰ Dewan Bahasa Dan Pustaka, Kamus Dewan Edisi Keempat, diakses daripada <https://prpm.dbp.gov.my/Cari1?keyword=adat&d=41812&#LIHATSINI>.

¹¹ Wan Fakhrul Razi Wan Mohamad, et al. 'Elemen Akidah Dalam Surah Yasin: Satu Sorotan Awal', Special Edition 14 (2021): 16.

Surah Yāsīn dibaca ketika ada orang sedang sakit, tengah nazak, dalam majlis Tahlil selepas kematian dan dalam upacara keraian lain-lain.”¹²

Pengamalan bacaan surah Yāsīn pada malam Jumaat telah lama diamalkan di Malaysia sejak daripada dahulu lagi. Amalan ini merupakan amalan turun-temurun daripada satu generasi kepada satu generasi berdasarkan ijtiḥad para ulama. Berdasarkan satu kertas kerja yang pernah dibentangkan di Seminar Pendidikan Fatwa Peringkat Negeri Sabah yang bertajuk ‘Amalan Peribadatan Masyarakat Melayu Nusantara Berteraskan Manhaj Ahlu Sunnah Wa Jamaah’ telah dapat dipastikan asal-usul amalan bacaan Yāsīn di Malaysia dan amalan-amalan lain yang berkaitan. Dalam kertas kerja tersebut ada menyatakan:

“Amalan peribadatan yang diamalkan oleh masyarakat Islam di Alam Melayu adalah amalan soleh yang bersumberkan ijtiḥad para ulama muḥtabar... Berdasarkan kajian, amalan peribadatan yang diamalkan oleh masyarakat Islam di Alam Melayu, yang diwarisi daripada satu generasi ke generasi adalah bersumberkan amalan yang diijtiḥadkan oleh Syaykh Ahmad al-Qushashi, seorang ulama di Madinah al-Munawwarah kurun ke-17M... ini membuktikan bahawa amalan peribadatan yang dilakukan oleh umat Islam di Alam Melayu selama ini adalah bersumber amalan yang telah dilaksanakan oleh umat Islam di Ḥaramayn; Mekah dan Madinah.”¹³

Bukan itu sahaja, pengamalan bacaan Yāsīn di Malaysia bukan setakat dikhususkan pada malam Jumaat sahaja. Bacaan Yāsīn juga sering dibaca sebagai salah satu aktiviti keagamaan dan kerohanian bagi umat Islam di Malaysia. Menurut Zaleha Embong, Aktiviti agama merupakan aktiviti yang mendapat sambutan daripada masyarakat Kawasan Rukun Tetangga (KRT) antaranya ceramah keagamaan, kursus mandi jenazah, bacaan Yāsīn, forum, gotong-royong membersihkan rumah ibadat dan perkuburan.¹⁴ Bahkan menurut Sharifah Nooraida Wan Hasan dan Sharifah Fatimah Wan Jamel, aktiviti bacaan Yāsīn menjadi antara 10 aktiviti surau yang disukai remaja.¹⁵

2. Metodologi Kajian

Kajian ini menggunakan metodologi kepustakawan. Buku-buku, jurnal-jurnal serta bahan penulisan lain dirujuk bagi menjalankan kajian ini. Kajian ini dilaksanakan bertujuan mengkaji status hadith kelebihan membaca surah Yāsīn pada malam Jumaat yang menjadi sandaran pengamalan surah ini di Malaysia pada malam Jumaat. Selain itu, kajian ini juga bertujuan memahami hukum membaca surah Yāsīn pada malam Jumaat secara khusus dan pada malam-malam lain secara umum. Bagi mendapatkan status hadith kelebihan membaca surah Yāsīn pada malam Jumaat, kajian *takhrij al-ḥadīth* dijalankan dengan menggunakan perisian

¹² Norsaleha Mohd. Salleh, et al. ‘Religious Leaders’ Views Living Hadith Practices In Malaysia’, Jurnal Living Hadith 5/2 (2020): 174.

¹³ Arieff Salleh Rosman, Mohd Syukri Yeoh Abdullah, ‘Amalan Peribadatan Masyarakat Melayu Nusantara Berteraskan Manhaj Ahlu Sunnah Wa Jamaah’, (Kertas Kerja Seminar Pendidikan Fatwa Peringkat Negeri Sabah, 14 Ogos 2023).

¹⁴ Zaleha Embong, ‘Pengurusan Masyarakat Kepelbagaian Dalam Kawasan Rukun Tetangga Di Malaysia: Satu Analisis’, (Prosiding Proceeding of International Conference on Ummah, 2022).

¹⁵ Sharifah Nooraida Wan Hasan, Sharifah Fatimah Wan Jamel, ‘Tinjauan Keperluan Aktiviti Kerohanian Dalam Kalangan Guru Pelatih Muslimah Di IPG Kampus Batu Lintang’, Jurnal Penyelidikan IPG Kampus Batu Lintang 10 (2011): 7.

maktabah al-Shāmilah. Kitab-kitab hadith primer dan bersanad dirujuk bagi mendapatkan sumber asal bagi hadith-hadith yang dikaji. Kaedah *dirāsah al-asānīd* bagi setiap riwayat hadith yang ditemui turut digunakan bagi mengkaji status setiap sanad. Oleh itu, kitab-kitab biografi perawi hadith serta *‘ilal al-ḥadīth* seperti *marāsīl* menjadi rujukan utama kajian ini. Jurnal-jurnal berkaitan dengan pengamalan bacaan surah Yāsīn di Malaysia juga turut dirujuk bagi mengetahui latar belakang pengamalan ini.

Bagi mengkaji hukum membaca surah Yāsīn pada malam Jumaat pula, kaedah *uṣūl al-fiqh* berserta dengan dalil digunakan berdasarkan kitab-kitab *fiqh* dan kitab-kitab hadith yang berkaitan. Penelitian *fiqh al-ḥadīth* terhadap hadith-hadith yang dikaji turut dijalankan bagi memperluaskan kajian berkenaan keharusan membaca surah Yāsīn pada malam Jumaat. Bagi menerangkan hukum membaca surah Yāsīn pada malam Jumaat, nas al-Quran dan hadith menjadi rujukan utama dalam kajian ini. Rujukan sekunder yang membincangkan isu berkaitan turut diteliti bagi menyokong hasil kajian yang dijalankan.

3. Takhrij al-Ḥadīth Kelebihan Membaca Surah Yāsīn Pada Malam Jumaat

Berdasarkan kajian yang dilakukan, didapati hanya ada satu hadith sahaja yang mengkhususkan kelebihan membaca surah Yāsīn pada malam Jumaat. Hadith tersebut adalah hadith riwayat Abū Hurayrah RA, daripada Nabi SAW bersabda:

من قرأ ليلة الجمعة حم الدخان ويس أصبح مغفورا له

Maksudnya: Sesiapa yang membaca pada malam Jumaat *Ḥā mīm al-Dukhan* dan *Yāsīn*, dia telah diampunkan ketika memasuki waktu pagi.¹⁶

(Riwayat al-Bayhāqī)

Hadith dengan lafaz tersebut diriwayatkan oleh al-Bayhaqī dalam *Shu‘ab al-Īmān* melalui jalan Hishām bin Ziyād daripada Abū Hurayrah. Menurut al-Bayhaqī, Hishām bin Ziyād seorang yang *ḍa‘īf*. Akan tetapi menurut Ibn Hajar al-‘Asqalānī beliau seorang *matrūk*¹⁷ dan al-Dhahabī menyatakan *ḍa‘īf* *‘afūh* (ضعفوه).¹⁸ Maka sanad hadith ini dapat dihukumkan sebagai *ḍa‘īf jiddan*. Hadith ini juga pada asalnya berkemungkinan telah berlaku kekeliruan pada salah seorang perawi al-Bayhaqī. Hal ini kerana, lafaz yang lebih tepat telah diriwayatkan oleh Abū Ya‘lā al-Mawṣilī dalam *Musnad* beliau seperti berikut:

من قرأ يس في ليلة أصبح مغفورا له، ومن قرأ حم التي يذكر فيها الدخان في ليلة الجمعة أصبح مغفورا له

Maksudnya: Sesiapa yang membaca pada waktu malam surah *Yāsīn*, dia telah diampunkan ketika memasuki waktu pagi. Dan sesiapa yang membaca *Ḥā mīm* yang dikenali sebagai surah *al-Dukhan* pada malam Jumaat, ia telah diampunkan ketika memasuki waktu pagi.¹⁹

¹⁶ Al-Bayhāqī, Ahmad bin Ḥusayn. *Shu‘ab al-Īmān*, (Saudi: Maktabah al-Rushd, 2003), no hadis 2248, 4:104.

¹⁷ Al-‘Asqalānī, Ahmad bin ‘Alī. *Taqrīb al-Tahdhīb*. (Saudi: Dār al-Minhāj, 2009), 602.

¹⁸ Al-Dhahabī, Muḥammad bin Ahmad. *Al-Kāshif*, (Saudi: Dār al-Qiblah, 1992), 2:336.

¹⁹ Al-Mawṣilī, Ahmad bin ‘Alī. *Musnad Abī Ya‘lā al-Mawṣilī*, (Mesir: Dār al-Hadīth, 2013), no hadis. 6224, 8:413.

(Riwayat Abū Ya‘lā al-Mawṣilī)

Walaupun hadith yang mengkhususkan kelebihan membaca surah Yāsīn pada malam Jumaat terlalu *ḍa‘īf*, akan tetapi terdapat beberapa hadith lain yang mempunyai maksud yang hampir sama maksud dengan lafaz hadith ini. Antara lafaznya adalah seperti berikut:

1. Hadith daripada Abū Hurayrah RA, sabda Rasulullah SAW:

من قرأ يس في ليلة التماس وجه الله غفر له

*Maksudnya: Sesiapa yang membaca surah Yāsīn pada waktu malam mengharapakan pengampunan Allah baginya pengampunan.*²⁰

(Riwayat Abū Dawūd al-Ṭayālīsī)

Hadith ini diriwayatkan oleh Abū Dawūd al-Ṭayālīsī daripada Jasr al-Kūfī al-Yamāmī daripada al-Ḥasan daripada Abū Hurayrah. Menurut Ibnu Ḥajar al-‘Asqalānī Jasr bertaraf *maqbūl*.²¹ Menurut Ibn Abī Ḥātim berkenaan Jasr dalam *al-Jarḥ Wa al-Ta‘dīl* “beliau ialah al-Yamāmī, tidaklah aku melihat pada hadithnya sebarang kelemahan”.²² Jadi Jasr al-Yamāmī bertaraf *ṣaḍūq*. Akan tetapi sanadnya *ḍa‘īf* disebabkan al-Ḥasan al-Baṣrī tidak mendengar hadith daripada Abū Hurayrah sebagaimana menurut ‘Alī al-Madīnī.²³

2. Hadith lain juga daripada Abū Hurayrah RA, daripada Rasulullah SAW bersabda:

من قرأ يس في ليلة ابتغاء وجه الله، غفر له في تلك الليلة

*Maksudnya: Sesiapa yang membaca Yāsīn pada waktu malam mengharapakan pengampunan Allah, maka dia telah diampunkan pada malam tersebut.*²⁴

(Riwayat al-Dārimī)

Hadith ini diriwayatkan oleh al-Dārimī melalui jalan al-Ḥasan al-Baṣrī daripada Abū Hurayrah. Hadith dengan lafaz yang hampir sama juga diriwayatkan oleh al-Bayhaqī dalam *Shu‘ab al-Īmān*²⁵ melalui jalan al-Ḥasan al-Baṣrī daripada Abū Hurayrah. Sanad hadith ini juga *ḍa‘īf* disebabkan *mursal* al-Ḥasan al-Baṣrī.

3. Hadith daripada Jundab bin ‘Abdullah RA, daripada Rasulullah SAW bersabda:

من قرأ يس في ليلة ابتغاء وجه الله غفر له

²⁰ Al-Ṭayālīsī, Sulaymān bin Dawūd. *Musnad Abī Dawūd al-Ṭayālīsī*. (Mesir: Dār Hijr, 1999) no. hadis. 2589.

²¹ Al-‘Asqalānī, Aḥmad bin ‘Alī. *Taqrīb al-Tahdhīb*. (Saudi: Dār al-Minhāj, 2009), 178.

²² Ibn Abī Ḥātim, ‘Abd al-Raḥman bin Muḥammad. *Al-Jarḥ Wa al-Ta‘dīl*, (Beirut: Dār Iḥyā’ al-Turāth al-Islāmī, 1952), 2:538.

²³ Ibn al-‘Irāqī, Aḥmad bin ‘Abd al-Raḥīm. *Tuḥfat al-Taḥṣīl Fī Dhikri Ruwāt al-Marāsīl*. (Saudi: Maktabah al-Rushd, 1999), 70.

²⁴ Al-Dārimī, ‘Abd Allah bin ‘Abd al-Raḥmān. *Musnad al-Dārimī*, (Saudi: Dār al-Mughnī, 2000), no hadith. 3460, 4:2150.

²⁵ Al-Bayhaqī, Aḥmad bin Ḥusayn. *Shu‘ab al-Īmān*, (Saudi: Maktabah al-Rushd, 2003), no hadis. 2236.

*Maksudnya: sesiapa yang membaca surah Yāsīn pada waktu malam mengharapkan pengampunan Allah maka dia telah diampunkan.*²⁶

(Riwayat Ibn Ḥibbān)

Hadith dengan lafaz ini diriwayatkan oleh Ibn Ḥibbān melalui jalan al-Ḥasan al-Baṣrī daripada Jundab bin ‘Abdullah. Sanad hadith ini dihukum sebagai *ḍa‘īf* disebabkan al-Ḥasan al-Baṣrī tidak mendengar hadith daripada Jundab. Menurut Abū Ḥātim, tidak benar bahawa al-Ḥasan mendengar hadith daripada Jundab.²⁷

4. Hadith daripada Ibn Mas‘ūd RA, daripada Rasulullah SAW bersabda:

من قرأ يس في ليلة أصبح مغفورا له

*Maksudnya: sesiapa yang membaca surah Yāsīn pada waktu malam, dia telah diampunkan setelah memasuki waktu pagi.*²⁸

(Riwayat Abū Nu‘aym)

Hadith dengan lafaz ini diriwayatkan oleh Abū Nu‘aym melalui jalan ‘Abdul Ghaffār bin al-Qāsim daripada ‘Amrū bin Murrah daripada al-Ḥārith bin Suwayd daripada Ibn Mas‘ūd RA. Sanad hadith ini juga dihukumkan sebagai *ḍa‘īf* disebabkan ‘Abdul Ghaffār bin al-Qāsim dinilai *ḍa‘īf* oleh kebanyakan imam hadith. Menurut Ibn ‘Adī beliau mempunyai hadith-hadith yang baik akan tetapi hadith-hadithnya tidak disokong oleh riwayat lain, seorang syiah yang melampau, Shu‘bah meriwayatkan dua hadith daripada beliau, dibenarkan untuk meriwayatkan hadithnya walaupun dalam keadaan *ḍa‘īf*.²⁹

Berdasarkan *takhrīj al-hadīth* bagi hadith-hadith yang dinyatakan, dapat dipastikan terdapat dua bentuk hadith yang berkaitan dengan kajian hadith ini. Bentuk-bentuknya adalah seperti berikut:

- i. Bentuk hadith pertama: Kelebihan membaca surah Yāsīn khusus pada malam Jumaat.
- ii. Bentuk hadith kedua: Kelebihan membaca surah Yāsīn pada waktu malam secara umum.

Status hadith bagi hadith kelebihan membaca surah Yāsīn pada waktu malam secara umum dapat dihukumkan sebagai *ḥasan lighayrih* disebabkan riwayat-riwayat yang ada saling menguatkan. Manakala status hadith bagi hadith kelebihan membaca surah Yāsīn pada malam Jumaat dapat dihukumkan sebagai *ḍa‘īf*. Walaupun sanad hadith kelebihan membaca surah Yasin pada malam Jumaat adalah *ḍa‘īf jiddan*, akan tetapi ia dikuatkan dengan hadith yang lebih umum iaitu hadith kelebihan membaca surah Yāsīn pada waktu malam. Hal ini kerana, malam Jumaat termasuk dalam keumuman pada waktu malam hari-hari yang lain.

²⁶ Ibn Ḥibbān, Muḥammad bin Ḥibbān. *Al-Taḳāsim Wa al-Anwā‘*, (Beirut: Dār Ibn Ḥazm, 2012), no. hadis. 211, 1:239.

²⁷ Ibn al-‘Irāqī, Aḥmad bin ‘Abd al-Raḥīm. *Tuḥfat al-Taḥṣīl Fī Dhikri Ruwāt al-Marāsīl*. (Saudi: Maktabah al-Rushd, 1999), 73.

²⁸ Al-Aṣbahānī, Aḥmad bin ‘Abd Allah Abū Nu‘aym. *Ḥilyat al-Awliyā‘ Wa Ṭabaqāt al-Aṣfiyā‘*, (Mesir: Maṭba‘ah al-Sa‘ādah, 1974), 4:130.

²⁹ Ibn ‘Adī, Aḥmad bin ‘Adī. *Al-Kāmil Fī Ḍu‘afā‘ al-Rijāl*, (Beirut: al-Kutub al-‘Ilmiyyah, 1997), 7:20.

4. Hukum Membaca Surah Yāsīn Pada Malam Jumaat

Berdasarkan kajian *takhrīj al-ḥadīth* sebelum ini, terdapat beberapa hadith berkaitan fadilat atau kelebihan beramal membaca surah Yāsīn pada waktu malam secara umum. Oleh itu, keharusan membaca surah Yāsīn pada waktu malam secara umum dapat dipastikan menurut perspektif hukum syarak. Hal ini kerana syarak membenarkan keharusan tersebut berdasarkan kaedah *uṣūl al-fiqh* berikut:

الاية أو الحديث إذا شملت بعمومها أمرا دل على مشروعيته

*Maksudnya: Jika sebuah ayat al-Quran atau hadith yang mengandungi perintah bersifat umum, maka ia menunjukkan kepada pengesahan hukum perintah tersebut.*³⁰

Berdasarkan kaedah yang telah dinyatakan, terdapat beberapa nas daripada al-Quran dan hadith yang menyokong keharusan membaca surah Yāsīn pada waktu malam. Menurut al-Nawawī³¹, seseorang itu hendaklah memelihara pembacaan al-Quran pada waktu malam dan pada solat malam berdasarkan firman Allah SWT:

لَيْسُوا سَوَاءً مِّنْ أَهْلِ الْكِتَابِ أُمَّةٌ قَائِمَةٌ يَتْلُونَ آيَاتِ اللَّهِ آنَاءَ اللَّيْلِ وَهُمْ يَسْجُدُونَ ﴿١١٣﴾

Maksudnya: Ahli-ahli Kitab itu tidaklah sama. Di antaranya ada golongan yang (telah memeluk Islam dan) tetap (berpegang kepada agama Allah yang benar) mereka membaca ayat-ayat Allah (Al-Quran) pada waktu malam, semasa mereka sujud (mengerjakan sembahyang). (113)."

(Surah Āli ‘Imrān, 3:113)

Selain itu, keharusan membaca surah Yāsīn pada waktu malam termasuk dalam keumuman hadith yang diriwayatkan oleh Ibn Mas‘ūd RA, bahawa Rasulullah SAW telah bersabda:

من قرأ حرفا من كتاب الله فله به حسنة، والحسنة بعشر أمثالها، لا أقول الم حرف، ولكن

ألف حرف ولام حرف وميم حرف

*Maksudnya: Barangsiapa yang membaca satu huruf dalam Al-Quran maka baginya satu kebaikan dan setiap kebaikan itu digandakan menjadi sepuluh kebaikan yang semisal dengannya. Aku tidak mengatakan alif lām mīm (الم) satu huruf, akan tetapi alif satu huruf, lām satu huruf dan mīm satu huruf.*³²

(Riwayat al-Tirmidhī)

³⁰ Al-Ahdal, Sayyid Muḥammad bin Maqbūl, *Sunniyyah Raf‘ul Yadayn Fī al-Ḍu‘ā’ Ba‘da al-Ṣalāh* (Mesir: Maktabah al-Qāhirah, 2014), 94.

³¹ Al-Nawawī, Muḥyi al-Dīn bin Sharf, *Tibyan fī Ādāb Ḥamalah al-Qur‘ān* (Saudi: Dār al-Minhāj, 2018), 82.

³² Al-Tirmidhī, Muḥammad bin ‘Īsā. *Sunan al-Tirmidhī*, (t.t.p: Mustafā al-Bābī al-Ḥalabī, Mesir, 1975), no hadis. 2901, 5:175.

Berdasarkan dalil-dalil yang telah dinyatakan, membaca apa-apa surah atau ayat al-Quran pada waktu siang atau malam dapat dihukumkan sebagai sunat. Bahkan seseorang digalakkan untuk memperbanyak ibadah dengan membaca ayat al-Quran mengikut kemampuan dan waktu yang lapang. Bukan itu sahaja, keharusan membaca surah Yāsīn pada waktu malam disokong oleh dalil yang khusus berkenaan dengan kelebihan membaca surah Yāsīn pada waktu malam seperti yang dinyatakan dalam perbincangan *Takhrij al-Ḥadīth* Kelebihan Membaca Surah Yāsīn Pada Malam Jumaat. Antara hadithnya adalah seperti hadith yang diriwayatkan oleh Jundab bin ‘Abdullah RA, daripada Rasulullah SAW bersabda:

من قرأ يس في ليلة ابتغاء وجه الله غفر له

*Maksudnya: Sesiapa yang membaca surah Yāsīn pada waktu malam mengharap pengampunan Allah maka dia telah diampunkan.*³³

(Riwayat Ibn Ḥibbān)

Pada lafaz hadith tersebut terdapat *ism al-nakirah* (kata nama yang menunjukkan sesuatu yang tidak ditentukan)³⁴ pada perkataan *laylah* (ليلة). Oleh itu, terdapat kaedah usul fiqh yang dinyatakan ulama seperti berikut:

النكرة إذا وقعت في سياق الشرط تكون للعموم

*“Apabila al-nakirah itu berlaku dalam konteks syarat, maka al-nakirah tersebut membawa makna umum.”*³⁵

Berdasarkan kaedah ini, perkataan *laylah* (ليلة) pada hadith ini adalah nakirah yang membawa maksud “malam” tanpa diikatkan dengan sebarang perkataan lain. Maka, seseorang itu boleh membaca surah Yāsīn pada setiap malam sama ada malam tersebut telah ditentukan oleh pembaca atau tidak ditentukan.

Walaupun terdapat hadith *ḍa‘īf* yang menyatakan kelebihan membaca surah Yāsīn pada malam Jumaat, para ulama membenarkan seseorang beramal dengan hadith *ḍa‘īf* beserta garis panduan yang telah ditetapkan seperti amalan tersebut termasuk dalam dalil umum ayat al-Quran atau hadith yang diterima untuk dijadikan hujah dalam hukum syarak. Tambahan pula, menurut al-Laknawī, seseorang itu tidak boleh mewajibkan perkara yang tidak wajib dalam syarak dan tidak boleh mengharamkan apa yang tidak diharamkan oleh syarak.³⁶

³³ Ibn Ḥibbān, Muḥammad bin Ḥibbān. *Al-Taḥqīm Wa al-Anwā‘*, (Beirut: Dār Ibn Ḥazm, 2012), no hadis. 211, 1:239.

³⁴ ‘Alī al-Jārim, Muṣṭafā Amīn. *Al-Naḥw al-Wāḍiḥ Fī Qawā‘id al-Lughah al-‘Arabīyyah*. (t.t.t: al-Dār al-Miṣriyyah al-Sa‘ūdīyyah Li al-Ṭibā‘ah, t.t)

³⁵ Al-Dimyāṭī, ‘Abd al-Karīm Al-Maṭarī. *Ḥāshiyah ‘Alā Sharḥ Shihāb al-Dīn al-Ramī ‘Alā al-Sittīn Mas‘alah* (Mesir: ‘Isā al-Bābī al-Ḥalabī, t.t), 16. Al-Bujayrimī, Sulaymān bin Muḥammad. *Ḥāshiyah al-Bujayrimī ‘Alā Sharḥ Manhaj al-Ṭullāb*, (Mesir: Mustafā al-Bābī al-Ḥalabī, 1950), 3:457. Al-Karmānī, Muḥammad bin Yūsuf. *Al-Kawākib al-Durārī ‘Alā Sharḥ Ṣaḥīḥ al-Bukhārī*, (Mesir: Dār Iḥyā’ al-Turāth al-‘Arabī, 1981), 2:114. Al-Subkī, ‘Alī bin ‘Abd al-Kāfī. *Al-Ibhāj Fī Sharḥ al-Minhāj*, (Dār Kutub al-Islāmiyyah, 1984), 2:106.

³⁶ Al-Laknawī, Muḥammad Ibn ‘Abd al-Ḥayy, *Iqāmat al-Hujjah ‘Alā Anna Ikthār Fī Ta‘ābud Laysa Bi Bid‘ah* (Mesir: Dār al-Quds, 1994) 127.

KESIMPULAN

Berdasarkan kajian *takhrīj al-hadīth* dan *fiqh al-hadīth* bagi hadith kelebihan membaca surah Yāsīn pada malam Jumaat, dapat disimpulkan bahawa terdapat sumber asal dan dalil bagi pengamalan bacaan surah Yāsīn pada malam Jumaat. Status hadith bagi hadith yang mengkhususkan kelebihan membaca surah Yāsīn pada malam Jumaat adalah *ḍa'īf*. Manakala hadith kelebihan membaca surah Yāsīn pada waktu malam secara umum dapat dihukumkan sebagai *ḥasan lighayrih*. Adapun hukum membaca surah Yāsīn pada malam Jumaat adalah harus berdasarkan dalil yang lebih umum daripada nas al-Quran mahupun hadith Nabi SAW. Tambahan pula hadith *ḍa'īf* berkenaan kelebihan membaca surah Yāsīn pada malam Jumaat boleh diamalkan kerana termasuk dalam perkara *faḍā'il al-a'māl* (kelebihan beramal) dan juga termasuk dalam umum hadith kelebihan membaca surah Yāsīn pada waktu malam.

RUJUKAN

- Aḥmad bin Muḥammad bin Ḥanbal. *Musnad Aḥmad*. (Beirut: Mu'assasat al-Risālah, 2001)
- Al-Aḥdal, Sayyid Muḥammad bin Maqbūl, *Sunniyyah Raf'ul Yadayn Fī al-Ḍu'ā' Ba'da al-Ṣalāh* (Mesir: Maktabah al-Qāhirah, 2014)
- Al-'Allā'ī, Khalīl bin Kaykaladī. *Jāmi' al-Taḥṣīl Fī Aḥkām al-Marāsīl*. (Beirut: 'Alim al-Kutub, 1986)
- Al-Aṣbahānī, Aḥmad bin 'Abd Allah Abū Nu'aym. *Ḥilyat al-Awliyā' Wa Ṭabaqāt al-Aṣfiyā'*. (Mesir: Maṭba'ah al-Sa'ādah, 1974).
- Al-'Asqalānī, Aḥmad bin 'Alī. *Taqrīb al-Tahdhīb*. (Saudi: Dār al-Minhāj, 2009)
- Al-Bayḥāqī, Aḥmad bin Ḥusayn. *Shu'ab al-Īmān*. (Saudi: Maktabah al-Rushd, 2003)
- Al-Bazzār, Aḥmad bin 'Amrū. *Musnad al-Bazzār: al-Baḥr al-Zakḥkhār*. (Saudi: Maktabah al-'Ulūm Wa al-Ḥikam, 2009)
- Al-Bujayrimī, Sulaymān bin Muḥammad. *Ḥāshiyah al-Bujayrimī 'Alā Sharḥ Manḥaj al-Ṭullāb* (Mesir: Mustafā al-Bābī al-Ḥalabī, 1950)
- Al-Dārimī, 'Abd Allah bin 'Abd al-Raḥmān. *Musnad al-Dārimī*. (Saudi: Dār al-Mughnī, 2000)
- Al-Dhahabī, Muḥammad bin Aḥmad. *Al-Kāshif*. (Saudi: Dār al-Qiblah, 1992)
- Al-Dimyāṭī, 'Abd al-Karīm Al-Maṭarī. *Ḥāshiyah 'Alā Sharḥ Shihāb al-Dīn al-Ramlī 'Alā al-Sittīn Mas'alah* (Mesir: 'Isā al-Bābī al-Ḥalabī, t.t)
- 'Alī al-Jārim, Muṣṭafā Amīn. *Al-Naḥw al-Wāḍih Fī Qawā'id al-Lughah al-'Arabiyyah*. (t.t.t: al-Dār al-Miṣriyyah al-Sa'ūdiyyah Li al-Ṭibā'ah, t.t)
- Al-Karmānī, Muḥammad bin Yūsuf. *Al-Kawākib al-Durārī 'Alā Sharḥ Ṣaḥīh al-Bukḥārī* (Mesir: Dār Iḥyā' al-Turāth al-'Arabī, 1981)
- Al-Laknawī, Muḥammad bin 'Abd al-Ḥayy, *Iqāmat al-Hujjah 'Alā Anna Ikthār Fī Ta'ābud Laysa Bi Bid'ah* (Mesir: Dār al-Quds, 1994)
- Al-Mawṣilī, Aḥmad bin 'Alī. *Musnad Abī Ya'lā al-Mawṣilī*. (Mesir: Dār al-Ḥadīth, 2013)
- Al-Nawawī, Muḥy al-Dīn bin Sharf, *Tibyan fī Ādāb Ḥamalah al-Qur'ān* (Saudi: Dār al-Minhāj, 2018)

- Al-Qurṭubī, Muḥammad bin Aḥmad, *al-Jāmi' Li'ahkām al-Qurān*. (Mesir: Dār al-Kutub al-Miṣriyyah, 1964)
- Al-Ṣabūnī, Muḥammad 'Ali, *Ṣafwah al-Tafāsīr*. (Beirut: al-Maktabah al-'Aṣriyyah, 2018)
- Al-Subkī, 'Alī bin 'Abd al-Kāfī. *Al-Ibhāj Fī Sharḥ al-Minhāj* (Dār Kutub al-Islāmiyyah, 1984)
- Al-Ṭayālīsī, Sulaymān bin Dawūd. *Musnad Abī Dawūd al-Ṭayālīsī*. (Mesir: Dār Hījri, 1999)
- Al-Tirmidhī, Muḥammad bin 'Īsā. *Sunan al-Tirmidhī*. (Mesir: Mustafā al-Bābī al-Ḥalabī, 1975)
- Arief Sallēh Rosman, Mohd Syukri Yeoh Abdullah, 'Amalan Peribadatan Masyarakat Melayu Nusantara Berteraskan Manhaj Ahlu Sunnah Wa Jamaah', (Kertas Kerja Seminar Pendidikan Fatwa Peringkat Negeri Sabah, 14 Ogos 2023): 1-34.
- Ibn Abī Ḥātim, 'Abd al-Raḥman bin Muḥammad. *Al-Jarḥ Wa al-Ta'dīl*. (Beirut: Dār Ihya' al-Turāth al-Islāmī, 1952)
- Ibn 'Adī, Aḥmad bin 'Adī. *Al-Kāmil Fī Du'afā' al-Rijāl*. (Beirut: al-Kutub al-'Ilmiyyah, 1997)
- Ibn al-'Irāqī, Aḥmad bin 'Abd al-Raḥīm. *Tuḥfat al-Taḥṣīl Fī Dhikri Ruwāt al-Marāsīl*. (Saudi: Maktabah al-Rushd, 1999)
- Ibn Ḥibbān, Muḥammad bin Ḥibbān. *Al-Taqāsim Wa al-Anwā'*. (Beirut: Dār Ibn Ḥazm, 2012)
- Ibn Kathīr, Ismā'īl bin 'Umar, *Tafsīr al-Qur'ān al-'Aẓīm*. (Arab Saudi: Dār Ṭaybah, 1999)
- Norsaleha Mohd. Salleh, Mohd Farid Ravi Abdullah, Abur Hamidi Usman, Rosni Wazir, Abu Zaki Ismail, Nurul Ain Burhanuddin, 'Religious Leaders' Views Living Hadith Practices In Malaysia', Jurnal Living Hadith 5/2 (2020): 171-193.
- Sharifah Nooraida Wan Hasan, Sharifah Fatimah Wan Jamel, 'Tinjauan Keperluan Aktiviti Kerohanian Dalam Kalangan Guru Pelatih Muslimah Di IPG Kampus Batu Lintang', Jurnal Penyelidikan IPG Kampus Batu Lintang 10 (2011): 1-13.
- Wan Fakhrul Razi Wan Mohamad, Abdul Hadi Awang, Mohd Manawi Mohd Akib, Syamim Zakwan Rosman & Muhammad Fakhrur Razi Shahabudin, 'Elemen Akidah Dalam Surah Yāsīn: Satu Sorotan Awal', Special Edition 14 (2021): 12-20.
- Zaleha Embong, 'Pengurusan Masyarakat Kepelbagaian Dalam Kawasan Rukun Tetangga Di Malaysia: Satu Analisis', (Prosiding Proceeding of International Conference on Ummah, 2022): 898-907.